

木

一 榜

一 簪

耕公侯

公位馬

鹽 梅

美尔維 鹽梅

木 梁

如構大厦 以頂棟梁

車

齊職儀曰太常卿

鍾肇鵬 編

職 史

鳳 池

又曰 鷄

三 台

奇 泯 然 生 魚 倫 者



古 籍

白 叢 殘

彙 編

二

北京圖書館出版社

古籍叢殘彙編

鍾肇鵬 編

北京圖書館出版社



第二冊目錄

文館詞林(二).....	一
類書三種.....	三五七
類林.....	四〇五
瑠玉集.....	四四一
七略別錄.....	五五三
七錄序目.....	五九七
韓詩內傳徵.....	六二五

文館詞林卷第四百五十九

碑卅九 百官廿九

中書令太子賓客監修國史文館學士上柱國高陽郡開國公臣許敬宗等奉 敕撰

都督三

隋李德林秦州都督陸杳碑銘一首 并序

李百藥洛州都督竇軌碑銘一首 并序

荊州都督劉瞻碑銘一首 并序

夔州都督黃君漢碑銘一首 并序

都督三

秦州都督陸杳碑銘一首 并序

隋李德林

公諱杳字雲邁清都臨漳人也有魏及茲門爲將相軒冕超
於六葉事業光於九有曾祖某司空公東郡莊王美鼎餽之

和垂台象之耀祖冀州刺史東郡惠公清猷雅望冠帶推重
父開府儀同三司東郡文宣公樹德行道摛紳注意公往家
河洛含章挺生水德不綱諸華漸亂臣有轉日主或寄坐家
家習從橫之說人人懷戰爭之圖公執操不羣早而秀異依
道遊藝俎豆而已然其屈迹和光卷舒不測異類喜其汎愛
同道貴其深誠故雅俗傾心聲高天邑魏司空咸陽王坦公
之舅也釋褐參其軍每步槐庭如映珠玉元象年中除都督
府主簿加明威之號轉淩江將軍大將軍中兵參軍所奉之
主卽文襄皇帝此則周武爲太子之朝魏文居卽將之府正
己膺正人之選文藝從文客之遊武定五年轉太常丞六年
授尙書左中兵郎仍歷度支金部庫部天保初轉倉部文宣

公薨公孝行昭著特改所居爲孝終里起兼行臺右丞巡江
慰勞時則侯景外叛殲蕩金陵自江已北始爲國有陳霸先
鳩集犬羊窺我王略公運籌於外往若風行地方數千一舉
而服七年以太夫人憂去職給假十旬起爲度支郎又轉都
兵含香粉壁年將一紀雖復器用見留時論咸以爲屈公怡
然自得未以升降爲懷遷成安令帝城之下舊號難綏齊導
有方大弘聲績尋授肅宗大丞相府從事中郎仍兼并省右
丞晉水之陽一相攸在霸者之佐知無不爲皇建初拜給事
黃門侍郎冠軍將軍大寧二年除散騎常侍夕郎顯任垂憲
官人出納如流見稱臺省北夷猾夏往寇太原王師驅逐已
出塞表防遏之理朝議猶切公前後受詔北築諸城東西接

連亘二千里城池作固沙漠無虞詔食永寧縣幹加輔國將軍賞勤幹也天統元年除銀青光祿大夫領兼太常少卿大樂大禮多所刊革敕監庫部營造軍器智均武庫職重軍謀事無不有才允斯任加驃騎大將軍假儀同三司五年出爲使持節都督東徐州刺史武平三年轉使持節都督北徐州諸軍事北徐州刺史此二除也九州之一士風如舊好尚亦同斯境之政始行彼地之人已化仁風和四時之氣德澤兼十日之雨一言出口千里俱應夏狄自馴淮夷清靖陰陽順序非籍景山之行邦國用康弗待休徵之力轉使持節都督秦州諸軍事秦州刺史有陳狷蹶寇我江陰城猶環堵忽被圍逼公班條爲政始隔時序外鄰卽慕其風台境已懷其德

既而身嬰沈痼大節感人縈帶固於金湯懷夫成於貔豹晨
昏相抗交戰必摧淹歷數旬顧有餘力以功賞開府儀同三
司痾恙積時憂勞致損薨於州館春秋五十三遐邇悲傷莫
不掩泣至是號令無主城府淪陷賊徒荷平生之意黎獻念
宿昔之恩各盡誠節奉送神柩某月日殯於故里之第贈使
持節都督瀛滄安三州諸軍事瀛州刺史尚書令將軍如故
加等之命以王事也除其子立卿爲膳部郎延嗣之賞義循
古昔年月葬於茲所惟公氣調清遠神彩明暢至察而能容
物機事不傷於道鄙仲舉之少通輕奉高之易挹生知在文
籍之外大學疏識悟之高昆季扶疏閭門禮讓各垂孝悌之
舉俱稱才幹之美自在朝行任兼內外竭誠陳力利物濟時

知幾若神應變如響至仁資執義之武深謀有不疑之斷上
立冥昧晚過寇讎若增算假年中其智略豈徒非朝伊夕肅
清藩部故當吳越平蕩翹足可期忽逢殄瘁之哀更長江湖
之惡人事不幸一至於斯天地不仁何其甚也故吏某官姓
名等日月逾往懷感彌至思騰聲實永永無窮勒石神道紀
功旌伐其銘

荀該四海袁號五公高門盛業時異人同愷悌君子降德玄
穹行爲準的孝極始終秩宗官次文昌禁宮移風易俗人代
天工京邑侯政江徼遐通入敷善績出建奇功宰朝霸府恆
擅芳風瑣門雲閣任寄愈隆國之大事其一者戎器械城雉
劬勞在躬附蟬高潔佩綬青蔥畫州分宰仁明有融人知恥

格時皆發蒙陳人違信望我關弓沈痾激憤渙義成雄或拒
或戰凶徒屢窮嗟乎命也逝水其東圖南落翮謁北歸豐師
霑泣雨城入妖虹豺狼得志藩邑俱空生排寥廓死困樊籠
伊昔邊守贈藥還童蠻夷感德禮敬斯崇故鄉送返無待交
夢哀榮旣畢卉木方叢徒傷人吏追慕充充

洛州都督竇軌碑銘一首

并序

李百藥

蓋聞補天立極大聖於是勃興政亂朝昏民臣以之陳力步
驟之跡旣弘經綸之會斯在固雷風通響成其化者立功韶
濩錯音應其時者人傑公諱軌字士則扶風平陵受終若帝
之初大啟鴻業中興復禹之績因生命氏廣國追讓之風聲
高外戚安豐功烈之美義正中台爰暨皇唐始於盛漢門感

靈貺母儀天下是故昭章圖牒冠冕指神經文緯武之才照
重光於百代撞鍾列鼎之盛流餘慶於千祀十二葉祖統雁
門太守大將軍武之從子也武以大功不遂爲閹官所誅統
避難亡奔出塞代爲南部大人威振華夏七葉祖羽魏太尉
遼東京公屬魏氏中微總攝朝政竭忠貞以安社稷挾幼主
而令姦雄曾祖略征北大將軍太保雍州牧柱國建昌孝公
德高禮縟鬱爲帝師清徽素範坐鎮雅俗祖熾魏侍中周大
宗伯隨太傅雍州牧上柱國鄧恭公以葢俗之姿運如神之
智道尊三代義盡一心父某周太宗伯襄州亳州總管上柱
國鄧國公挺將相之門懷棟梁之器位因功顯名以實高公
藉繁祉之資稟英靈之祚感白雲而諧庶績受璜玉而秘兵

鈴幼樹風神夙標名節志尙宏遠獨秀人倫期管樂於老成
望韓彭於兒戲軼雲羅於沮澤追電駕於當途隨仁壽中以
獻皇后挽卽授朝請卽遷資陽郡東曹掾苞湘納漢始涓澮
於濫觴蔽日干霄尙峙傾於覆簣氣憤風雲之際情察天人
之理石立之祥斯兆土崩之義有徵公家卽塗山姻連渭汭
想白狐之慶義屬過門望黃鳥之旗預欣同德及星屯秦并
電奄商郊軍次蒲城便杖劔請謁太上皇見公大悅言及平
生備獻誠款雖盧綰之出入臥內鄧禹之止宿禁中不能過
也命公爲渭南道大使招撫得以便宜從事取永豐之粟甚
漢卒之食敖倉下華陰諸縣同周師之據廣武既有宿飽之
資仍成搃喉之業以功授金紫光祿大夫封贊皇縣公又占

募英勇五萬餘人從入京師翊成大業揚州精甲未足擬議
薊市邪掄曾何等級及兵臨九地氣竭百樓以公爲東面大
將於時四夷雲合萬里風行彭濮比肩樊灌接踵皆出公麾
下止預偏裨任寄之重罕有其二平城之日功實先登進授
光祿大夫卽上柱國也仍除大丞相府諮議參軍事軍諮祭
酒此卽其人霸府洞開首膺高選尋而稽胡侵軼將徧近畿
公乃推轂專征大破凶黨復令公乘勝長驅討薛舉殘猾武
德元年拜太子詹事總司之要任切宮端才地之華允茲時
望尋遷使持節總管隴右諸軍事秦州刺史帶秦州道行軍
元帥秦隴形勝控馭遐遠雖地接京畿而人多異類西戎卽
序之地尙餘榛梗北狄背義之徒時警烽候總以司牧寄之

分圖事兼文武惟公是屬於是翦寇虐以威刑整風俗以平
典寬猛相濟化成朞月某年進封鄴國公食邑通前三千戶
二年以邛莢初平命公持節巡省以爲隴蜀道安撫大使三
年拜益州道行臺尙書左僕射擬跡文昌儀刑端右此之舉
也特異常倫仍以行臺兵從平伊洛然神旗所指事切來蘇
芻牧之勞尙資心力公處帷幄之內在行陣之間運籌執銳
功冠諸部四年平王充擒竇建德仍陪旌節獻捷京師凱樂
之辰五將同列元帥居首是惟聖上榮寵之盛今古未聞七
年廢行臺省仍權檢校益州大都督九年朝廷大論義旗已
來有大功於王室者並食眞邑公於是別賜益州封戶書社
六百家貞觀初拜使持節大都督益綿嘉邛陵雅簡眉八州

萬南會寧三都諸軍事益州刺史公自杖節華陽綿歷時序
懷荒撫衆之勤定笮存邛之效固以夜郎款徼昆彌率俾非
假諭蜀之文寧勞度瀘之役俘馘之衆每獻廟廷賓賦之多
充仞王府殉公益國不可勝言自秦昭平蜀歷茲永久或班
條刺舉或剖符共化竊比明德彼用多慙王哀樂職之篇益
爲小技王尊叱馭之舉非曰太忠文翁之修學校纔方進誘
李冰之斃江神多慙義烈自餘眇小夫何足言尋入爲右衛
大將軍加左光祿大夫文昌上將列位天庭軒禁鉤陳擬儀
震象惟公居之隱如敵國二年拜使持節行都督洛鄭伊懷
四州諸軍事洛州刺史左光祿大夫如故陰陽交會之所山
川作固之都先王以之下食今上於焉分陝居此地也實簡

帝心公道在公平義惟正直開物闡化急病讓夷訓五方繁
雜之毗化三川機巧之俗源清流潔風行草偃四年以疾薨
於館舍春秋若干五年葬於某所謚曰某公禮也惟公始於
立身終於行道操履端肅志尙清明未爲顯晦易情不以風
霜變節神用成九德之基天經爲百行之本早升庠序徧觀
流略旣韞從橫之志便輕俎豆之容數爲梁甫之吟每動崇
正之嘯王濬閭巷軒蓋有期陳蕃虛室閒居未掃觀象察變
窮數知來嘗覲赤伏之符且識黃神之命屬唐郊授手大濟
生靈匪止姻連帝家固以才膺王佐潛德之友本以雞酒相
期利見之辰還成魚水相得言行計用未藉三略之書戰勝
攻取自有萬夫之敵故能動合神心畢符冥契牧鯨鯢若摧

朽拉犀象如拾遺擁節臨藩捍城之道斯極分麾鞠旅方面之績居多功若正山屢形中旨心如金石且降王言而臨軍用兵莅官行政以爲不言之教藉震曜以爲威大道旣乖非仁慈之可化純以儒術漢帝謂之亂家先以刑書鄭相以之理國中興之道云盛遺愛之德猶存是以奉之以律令申之以檟楚侯嚴霜而厲威則飄風以疾惡至於舊交密戚彌行直道雖苟睢之忍對從母蘇章之暫禮故人無以喻也亦由至察共簡易相背強斷與附直相成故醜正之徒或傳謗盜憎之訟時聞旒屢爰自貞觀俗易時移太平之化伊始刑措之風愈洽公望表知裏在變能通協聖主之心遵上皇之始導德齊禮有恥且格自非惟幾以成務其能與於是乎其